

于湖居士文集

十二

于湖居士文集卷第三十九

尺牘

劉兩府

某幸甚昨者江行遂獲進拜榮戟恭惟領
軍開府相公道德勲業蟠際天地內洽草
木外薄夷虜中與以來一人而已况珠幢
玉節奉詔東下先聲所暨山川震疊賓客
如雲冠蓋相望士於茲時斬一望塵而拜
猶恐無因而至前某也晚出不肖又方放
棄湖海持剡修謁亟蒙賜見温顏頤接已

過涯分既又親屈英袞從以千騎訪之於
寂寞無人之境經綸之成謀宏濟之英畧
開示紬繹了無疑間卓乎偉哉弗可及已
嘗病茲世莪冠結綬車載斗量皆齷齪爲
身謀不足與共事無強人意者自承恃相
公以來於今十日竊自慶抃廼知名世篤
生人傑湛乎淵渟萃乎嶽峙至於得時而
行雷厲風飛桑蔭不徙大功克建則亦歛
然退託於不能之地弗以一毫留曾次求
之古昔有道之士從容應世如此耳即日



不審次舍何地上思見公與百執

士女望公之來何啻渴飢恭想小留鎮江
亟以介圭去朝帝所區區有懷願非筆舌
所能宣盡姑致歸鄉之意仰冀憐察

代摠得居士與葉參政

某仰惟相公昨者登貳西府有識之士固
已相慶知相公非苟富貴者得時而行必
大有以慰中外之心既而又相慶曰虜之
情偽深矣相公親涉其庭且究知之將爲
上盡言於是相公來歸天下傾耳以聽迺

三十一

二洞集三二

一

三

七月丁酉相公進長樞庭而郵置所傳相
公避遜之章所以復于上者蓋卓然以今
日之事自任又傳聞相公歸自北鄙即於
昕朝力陳機會之不可失黠虜包藏宜深
爲備天聽旣回國勢自尊帷幄所籌罔不
慰愜社稷幸甚生靈幸甚竊謂朝廷狃於
和議將二十年小大之目以兵爲諱軍政
不修邊備闕然長淮千里東南恃以爲藩
籬者一切置之度外而彼犬羊之聚麀凶
嘯毒未嘗南鄉而忘我自去春榷場廢朝

廷始聳然知虜意之所在將深圖之而上
下議論或未然一日復一日又至于今今
事迫矣天其或者將遂悔禍貽我 宋中
興之基於萬期年用是降大任於相公當
是責也左丞相湯公忠貫日月精慮微一
食息之頃未嘗不憂念國家未嘗不垂意
人物而往時諸賢人各有心或未知同寅
協恭以濟鴻業今天付相公以此事上意
如此天意如此相公之與湯公詎可不深
鑒往事惟和惟一以共圖休功也哉伏惟

相公深念之飢者易食渴者易飲中原之
人困於暴虐困於旱蝗困於力役死者比
屋矣遺民思 宋之心如遭水火而望救
援其勢已急千載一時間不容髮伏惟相
公深念之紹興初諸將用兵淮上毫泗徐
沂之人簞食壺漿以迎我師師退虜復取
之即盡屠其人以泄憤怒然民終不悔它
日我師至焉其迎我如初去冬蔣州王俊
但假托本朝名字淮北之人信以爲然自
蔡頴至于河北尅期響應會俊敗獲事雖

不克然以此可見吾民之心今我以一旅之衆渡淮則彼之鋤耰棘矜皆爲吾用建瓴破竹莫捷於此獨恐朝廷憚於先發耳伏惟相公深念之王戚李三將忠勇自力義無返顧然發縱指示必惟其人宜得大臣一其節制事當豫定若必待赤白囊至而後爲之應將無及矣伏惟相公深念之今日議事之臣翫歲愒日以相公與左丞相之所建立爲不然者以十人而九秋冬之交虜或未動則是議者必雜然謂邊頭本無事湯公葉公過爲之謀又將自怠以弛吾備以挫奮義者之心患將益深悔且噬臍伏惟相公深念之某憂患摧傷之餘所欠一死登相公之門蓋自蚤歲晚節末路獲備使令受任之地寔在窮邊平生志願庶其少見於此去歲單車赴古蔣適丁互市之變已而蒙恩攝帥除漕某生長淮甸知虜之情必不但已日夜究心思爲之憊蓋嘗縷縷白之廟堂至于十數丞相湯公深以爲當然而某人微望輕動輒齟

齟或者反以爲罪坐糜歲月徒自慨嘆今者相公既專宥密之寄深思孰慮日不暇給將以戡外侮而隆內治於斯時也竹頭木屑皆所不棄况如某受知之深者哉父子百口畢命驅馳指天誓心罔有二事伏惟相公憐而察之伏紙不勝忠憤激切之情

廟堂劄子

仰惟先生於從容無事之時不動聲氣爲聖天子建萬世之長策遠視古昔寔所創見一昨丙子詔書既下雖窮山幽谷婦人孺子亦皆感泣蓋所以慰率土之望昭在天之靈杜紛糾之源一視聽之歸再造災圖端自此日而今而後知黠虜之不敢侮我中國諸將之不敢輕我朝廷國勢日隆主威日振而先生之道德勲名能言之士所不得而稱載也某負罪屏處不得拜伏光範爲天下賀然竊喜恩地茂勲先立使某啜菽飲水槁死巖谷之間猶有榮耀伏惟財幸

湯丞相

某比以本路水灾如許飢民無聊復迫夏
秋流離道路園視無策乃卜中元節用道
士說肅齋三日醮於府治奏章祈恩二十
有五日本路漕司奉堂帖許令檢閣夏稅
而得旨蓋十六日也恭惟 聖天子出神
天之本真應帝王之興起我大丞相以侍
宸列仙來居上宰之位乃今蟣蝨微臣冒
昧有請綠函宵升皇澤朝下垂應如響恩
惠濃浹卓異之事實為創見某與此路數
十萬生聚望闕叩頭不知以何仰報帝力
與我相公全活之功也幸甚幸甚某在此
雖極力以治荒政但賑給二事徒有其名
無以徧給今獨有修圩一事朝廷所當加
意蓋今年圩不修則明年江上無田無田
則無民矣修圩藉民力民藉官給之食以
活而常平米既無餘則圩亦無自而修故
今日急先務莫若於江上得熟處廣糴轉
江而下積之蕪湖以湏水落興工此事參
政周丈頃在太平知之為詳伏望恩地速
賜經畫米不欲多得二十萬斛庶可從容

集事伏望大丞相念之不勝激切之禱

又劉兩府

某竊瞻國之盛衰必觀諸人望之用舍謝
太傅消搖東山雅意丘壑當時議者顧
謂安石不起如蒼生何言若大而夸然卒
之成肥水之功者安石也裴中立以讒居
外兩河諸侯浸淫問鼎中立復相忠者懷
而強者畏人望之用果如何哉自五月來
朔方傳聞洶洶豈惟自江以北百姓束擔
以待而江淝之間亦復騷然忽有郵書報
相公開帥府以號令諸將制冊揚廷恩禮
赫奕凡士大夫與夫閭巷之民田夫牧人
莫不歡喜奔走更相告語以謂相公既用
則吾事必濟無復憂矣至於赤籍伍符則
又踴躍抃厲以有赴敵致命義無却顧之
意黠虜震懾先聲所暨奉頭鼠竄遺魂
落膽烏乎休哉古未有也恭惟某官不世之
功成在旦夕便當肅清宮禁祇謁寢園某
無似庶將載筆後車草露布以俟獻也
某以久不省祖塋自宣城暫歸歷陽村落

一二日復西上矣民間恃相公近在維揚皆
得自安惟是民兵一事朝廷憂懼近日復
有約束分隸諸軍田野之人愈更皇恐孔
子曰以不教民戰是謂棄之周官井田之
法春蒐夏苗秋獮冬狩其坐作進退固
已閱習而猶曰不教者蓋謂未嘗教之以
知禮知義知信知勇如子犯之所云也今
之民雖坐作進退冥然不知乃欲驅之以
當大敵民之死不敢自愛萬一沮吾軍勢
悔將何及仰惟某官同國休戚知無不言
况此淮民又屬戲下敢告相公具以利害
達之冕旒將兩淮民社一切罷免豈惟十
萬生靈皆出全護脫性命於鋒鏑而緩急
之際不誤國事尤其大者也伏惟相公垂
情無以某小子而廢斯言熟計而亟圖
之無任激切恐懼之至

于湖居士文集卷第四十

尺牘

辭潭州劄子

某伏見邸報某蒙恩差知潭州伏念某罪戾之迹方自循省大藩謀帥遽先造化曲成之私曷可稱述顧其情有不能自己者輒吐露於相公之前昨者廣西之役不遑迎侍違二年水菽之養一訊往還動須數月親年益高時親藥餌人子之心豈獲寧處欲望惻然推錫類之仁稍易江淮間一小壘俾得自効誓當糜捐圖惟報禮控禱僭瀆伏深震懼

三五二

二湖集四一

一

六有

劉舍人

某遠去師範婁更歲籥雖側聞尺一徵還陟烏臺長道山西掖演綸北門視草極儒者逢辰之榮事而某也宿負未洗久違牋奏欲以書爲斯文賀莫之敢也追惟疇昔以諸生被獎拔懷恩未報引睇雲霄歸依何已

某恭惟先生經綸之業得時而用蓋將闔

我國家太平之基掌帝之制獨當省署箴
補袞闕體關廟社繫衆人睥睨而不敢發
先生回天於談笑之頃中興以來未有此
舉也其善甚盛惟天下自有公論抑某何
庸贊歎

某竊承賜對內朝至於移晷君臣契合實
啓興運暫即玉堂之舊將登袞位之嚴成
命旣傳孰不鼓舞某辱在門闌尤極欣感
先生兩宮虛佇百辟具瞻告廷有期福祉
咸萃更冀加衛茵鼎以副天下之望

三

三湖集四一

二

七

先生以文章德業致身而分閫于外有此
武功蓋英主側席寤寐將與共圖天下求
而不可得者也召節之放雖庸人孺子咸
知鼓舞可知公之德政矣門闌之舊嘗共
掬溜播灑之役者喜當如何

某罪戾之迹蒙先生薦進之恩俾主留務
雖成規具在可以遵行顧精神之運豈能
仰及婁辭不獲皇恐祇命尚俟躬拜師門
一一承教臨紙不勝懇禱之極某行役將
及近境瞻侍之日端復不遠引領轅門時

自扑蹈

劉樞密

某伏審易鎮要藩升華邃殿一面之託不啻九鼎重矣伏惟萬人之英明天子所簡敬豈重湖之地所當暫留開大莫府寬北顧憂付以萬世功業帝意可以卜見也某不勝宗廟朝廷之慶

某恭承先生經術文章議論名節近世儒宗蓋一二數至於英風義氣則千載一人今日廊廟尊安邊壘寧謐折衝之功豈無所自宰席尚虛而君臣之交中外之望如此爰立告廷恐不容緩應變守文公所優爲者太平之功自此一新天下之耳目矣

朱編修

某敬服名義願識面之日甚久非敢爲世俗不情語也得劉丈書又見與欽夫書知且爲衡嶽之遊儻遂獲奉從容何喜如之不勝朝夕之望

某昨日方從欽夫約遣人迓行李奉告乃承已至近境欣慰可量欽夫必授館不然

當於我乎館也使令輩遣前恐遠來者須更休耳應有委乞示下

風雨留人尊候復何如登臺詩彊勉不工出師表同上老兄遊山亦須待稍晴未可以遽千金之軀宜自愛惜洪濤際天溺馬殺人將安之耶

某平生慕用豈謂來湘中乃獲解后接款慰幸可勝言懷親遽歸苛留不得至今慊然人還一再奉賜書感服感服某老者笨動東歸之興比已專介請祠力致懇諸公

儻遂得之不旬月去此矣樞庭編摩望雖高然非所以處元晦也意者姑借此爲掀擢之漸耶此間諸事欽夫諸友書中必能詳言之政遠披承千萬珍護即登嚴近

敬簡堂記遂煩揮翰真可以託不朽但堂中之人於敬簡工夫殊未進須士友不我遐棄時時訓厲之耳欽夫間相從未嘗不矯首奉思也黃君內艱可念仲隆想已趨朝更不作書懷英行已踰月臨行瘍作於背甚可念幸而即愈渠自去歲得渴疾此

不可再也

某別去再見新歲懷鄉道義不能忘也自來荊州老者病甚思歸舟楫往來江上不復定處僕亦心志忽忽百事盡廢雖如元晦一書亦不暇遣乃兩奉誨教相予之意益勤內省愧惕不但不答書可以爲罪蓋敬簡之功不進它日無以見吾元晦耳某自到官即請去凡六七最後乞致仕乞尋醫且欲不俟報棄官而歸諸公乃亦相察今復得祠祿矣近制不必俟代者已治舟

楫載衣囊五七日使可離此劉丈之去竒哉偉哉此行至江上當迂數程見之亦約欽夫又不知肯來否欽夫却數通書定叟將有遠役兄弟不能相舍張仲隆前後五劄議論過人皆某所不能言者歎服元晦闕期已及聞未有幡然之意如何如何某有田在謝家青山下屋十餘間下俯江流今歸真不復出矣元晦異時或欲覽江淮山川之勝乘興東遊則僕可以奉從容於梁山博望慈湖采石之間也此外惟爲斯

文珍重

某近因至城西於土中得一碑碣細視之
良有刻畫蓋明皇所注道德經幢也磨治
之餘僅可識即以十夫掘取之其半在土
中者甚字字畫非經生所能及已昇寘府
中今裝褫一本去欽夫極愛之也經磨治
處中有大穴蓋以載他碑者尤古類漢碑
併遣上

楊抑之

屬者敷文奏課爲二千石第一廼眷寶度
實先帝謨訓所在陞華更直用報顯庸顧
士大夫交口贊慶而某獨不遣賀牘誠以
門下於此爲不足道也不識執事尚照其
心否

癸未詔書凡今郡太守若部刺史之有治
績者其各以叙補侍從之闕伏惟敷文莫
宜此選矣尺一趣覲祗在早莫敢以私告
某來歸親傍望建牙所在才數舍未皇具
一紙書長者先之愧何可量也冬日邊地
寒力不審台候比復何如公守邊內則能

固吾園外則使裔夷歸心羊陸見稱伋以此耳但玉關人老不容不亟召歸伏惟與時御宜促裝以俟

某晚出叨踰所學未充猖狂妄行以速大戾隆寬貫其九死猶得奉祠既至濡湏靜掃一室終日危坐以省昔愆它無可言者臨出都時信伯旣維舟矣亦蒙僮蓋至湖上存勞周渥此意不可忘也解榜見名得來示乃知小失意於上舍然來春自當巍中政爾無用此也

黃子默

某離長沙且十日尚在黃陵廟下波臣風伯亦善戲矣前日爲子默作江西後社字茫然莫知所謂至湘陰館中有題壁間二詩急雪黃花度初晴白石村者驚歎世間久無此作容謂此子默詩也歛然心服真可作社頭矣今日見計欽祖又誦數篇益竒蓋辭達於詩渾然天成風行水波偶入聲律非今之詩山谷之詩也幸甚斯文未墜於地時夜將半呼僮張燈作此紙且致

怨於不我教又聞有李東老者詩亦佳獨
不能以數句爲僕北歸篋中裝耶僮不棄
願馳一介送似欲誦之於岳陽樓南樓寒
溪西山也

于湖居士文集卷第四十

禁榜附

張安國舍人知撫州日以有賣藥假者出榜戒約曰

陶隱居孫真人因本草千金方濟物利生多積陰德名在列仙自此以來行醫貨藥誠心救人獲福報者甚衆不論方冊所載只如近時此驗尤多有只賣一真藥便家資鉅萬或自身安榮享高壽或子孫及第改換門戶如影隨形無有差錯又曾眼見貨賣假藥者其初積得些小家業自謂得計不知冥冥之中自家合得祿料都被減尅或自身多有橫禍或子孫非理破蕩致有遭天火被雷震者蓋緣贖藥之人多是疾病急切將錢告求賣藥之家孝弟順孫只望一服見效却被假藥誤賺非惟無益反致損傷尋常誤殺一飛禽走獸猶有因果况萬物之中人命最重無辜被禍其痛何窮詞多更不盡載

張于湖集附錄

張安國傳

孝祥字安國歷陽烏江人籍之七代孫邵之從子也讀書一過目不忘下筆頃刻數千言年十六領鄉書再舉冠里選紹興二十四年廷試第一策問師學淵源秦熺之子墳與曹冠皆力攻程氏專門之學孝祥獨不攻考官魏師遜已定墳冠多士孝祥次之曹冠又次之高宗讀策皆檜熺語於是擢祥第一而墳第三御筆批云議論確

正詞翰爽美宜以爲第一在廷百官莫不歎羨都人士爭錄其策而求識面授承事郎簽書鎮東軍節度判官先是上之抑墳而擢孝祥也秦檜已怒旣知孝祥乃祁之子祁與胡寅厚檜數憾寅且唱第後曹泳揖孝祥於殿廷以請婚孝祥不答泳撼之於是風言者誣祁有反謀詔繫獄會檜死上郊祀之二日魏良臣密奏散獄釋罪遂以孝祥爲秘書省正字故事殿試第一人次舉始召孝祥第甫一年得名繇此初對

百言乞總覽權綱以盡更化之美又言官吏忤故相意并緣文致有司觀望鍛鍊而成罪乞今有司即改正又言王安石作日錄一時政事美則歸已故相信任之專非特安石臣懼其作時政記亦如安石專用已意乞取已修日曆詳審定正黜私說以垂無窮從之遷校書郎會芝生太廟楹百官賀畢或獻賦頌孝祥獨上原芝一篇以諷之時儲位尚虛以大本未立爲言且言芝在仁宗英宗之室天意可見乞早定大

計高宗首肯遷尚書禮部員外郎尋爲起居舍人權中書舍人初孝祥登第出湯思退之門思退爲相擢孝祥甚峻而思退素不喜汪徹孝祥與徹同爲館職徹老成重厚而孝祥年少氣銳徃徃凌轢之至是徹爲御史中丞首劾孝祥奸不在盧杞下孝祥遂罷提舉江州太平興國宮於是湯思退之客稍稍被逐尋除知撫州年未三十蒞事精確老於州縣者所不及孝宗即位復集英殿修撰知平江府事繁劇孝祥剖

決庭無滯訟屬邑大姓並海囊橐爲奸利
孝祥捕治籍其家得穀粟數萬明年吳中
大饑乞賴以濟張浚自蜀還朝薦孝祥召
赴行在孝祥既素爲湯思退在知及受浚
薦思退不悅孝祥入對乃陳二相當同心
戮力以副陛下恢復之志且靖康以來惟
和戰兩言遺無窮禍要先立自治之策以
應之復言用才之路太狹乞博採度外之
士以備緩急之用上嘉之除中書舍人尋
除直學士院兼都督府參贊軍事俄兼領
建康留守言者改除敷文閣待制留守如
舊會金再犯邊孝祥陳金之勢不過欲要
盟宣諭使劾孝祥落職罷復集賢殿修撰
知靜江府廣南西路經畧安撫使治有聲
績復以言者罷俄起知潭州爲政簡易時
以威濟之湖南遂以無事復待制徙知荆
南湖北路安撫使築寸金堤自是荊州無
水患置萬盈倉以儲諸漕之運民德之請
祠會以疾終卒孝宗惜之有用才不盡之
嘆進顯謨直學士致仕年三十八孝祥俊

逸文章過人尤工翰墨嘗親書奏劄高宗見之曰必將名世

又宣城張氏信譜傳

公諱孝祥字安國學者稱爲于湖先生本貫和州烏江縣唐司業張籍七世孫秘閣修撰金國通問使邵之從子父祁任直秘閣淮南轉運判官紹興初年金人寇和州隨父渡江居蕪湖昇仙橋西時公甫數歲豫章王德機一見而竒之遂許以女焉幼敏悟書再閱成誦文章俊逸頃刻千言出

人意表轉運公嘗面池築室爲讀書所池故多蛙公以硯擲之聲遂永息人咸異之旣貴即以禁蛙名其池年十六領鄉書再舉冠里選紹興甲戌廷試擢進士第一時年二十有三策問師友淵源秦墳曹冠皆力攻程氏專門之學公獨以程氏得孔孟之緒先知貢舉湯思退已定墳魁多士帝讀其策皆檜語復自裁擇乃首擢公親灑宸翰議論堅正詞翰俱美先蕪湖東境有龍穿岸騰空風雷負異須臾雲霓五彩光

燭百里江山掩映如錦及捷聞人咸謂慶
雲爲公之先兆云先是岳飛卒於獄時廷
臣畏禍莫敢有言者公方第即上疏言岳
飛忠勇天下共聞一朝被謗不旬日而亡
則敵國慶幸而將士解體非國家之福也
又云今朝廷寃之天下寃之陛下所不知
也當亟復其爵厚恤其家表其忠義播告
中外俾忠魂瞑目于九原公道昭明于天
下帝特優容之時公尚在期集所猶未官
也秦相益忌之初授簽書鎮東節度判官

廳公事轉秘書省正字故事殿試第一人
次舉始召公第甫一年得召對勸帝總攬
權綱以盡更化之美又言官吏忤故相意
並緣父致有司觀望鍛鍊而成罪乞令有
司即改正之復言王安石作日錄一時政
事美則歸已故相信任之專非特安石臣
懼其作時政記者亦如安石專用已意乞
取已修日曆詳審是非正黜私說以垂無
窮從之遷校書郎勅兼國史實錄院校勘
會連歲芝生太廟楹百官表賀時儲位尚

虛公獨上原芝篇以諷之其畧曰惟大本未立社稷宗廟亦靡克寧響音又曰在仁宗英宗之室尺意可見乞早定大計高宗覽之首肯再三舉朝稱誦遷尚書禮部員外郎尋爲起居舍人權中書舍人初公與汪徹同館職修先朝實錄徹老成畏禍務在磨稜公少年氣銳欲悉情狀徃徃凌佛徹謂曰蔡中郎失身於董卓故不爲君子所與公曰顧自立何如思退聞之不悅於徹之言至是徹爲御史中丞乃首劾公等奸不在盧杞下遂罷提舉江州太平興國宮祀尋除知撫州事臨川詰卒趨劫庫兵一時鼎沸官吏屏跡公單騎馳赴軍中喻列校曰汝曹必欲爲亂請先殺太守僉曰不敢惟所給未數耳公即手喻衆卒聽命者待以不死隨取金帛以次支給摘發數卒叱之曰倡亂者罔赦立命斬之衆校俯伏不敢仰視闔城宴然事聞帝極嘉獎時年未三十蒞事精確雖老於州縣者所不逮也孝宗即位除集英殿修撰知平江軍府

事提舉學事賜紫金魚袋平江乃臨安藩
屏寄任匪輕公扶植善類鋤抑強暴判決
如流庭無滯獄屬邑有大姓煮海囊橐爲
姦利怙勢作威禍延郡邑公捕治籍其家
得粟數萬斛明年吳中饑乞賴以濟張魏
公還朝乃首薦公召赴行在入對勸帝辯
邪正審是非崇根本壯士氣因痛陳國家
委靡之弊且靖康以來惟和戰兩言遺無
窮禍要先立自治之策以應之又陳二相
當同心協力以副陛下恢復之志復陳用
才之路太狹乞博採度外之士以備緩急
之用上嘉之除中書舍人遷直學士院俄
兼都督府參贊軍事時魏公欲請帝幸建
康以圖進兵復薦公領建康留守湯思退
言改除敷文閣待制留守如舊及魏公罷
判福州宣諭劾公爲黨落職初轉運公築
歸去來堂領太平州事王侯柅更爲建狀
元第慶雲接日者見之謂將不利於金人
至是果符其言且自渡江以來大議惟和
與戰魏公主戰湯相主和公始登第出思

退之門及魏公志在恢復公力贊相且與
敬夫志同道合故魏公屢薦公遂不爲思
退所悅或者因公召對要先立自治之策
以應之等語謂公出入二相之門兩持其
說豈知公者哉思退竄仍復集英殿修撰
知靜江府廣南西路經畧安撫使治有聲
俄改知潭州權荆湖南路提點刑獄公事
爲政簡易時濟之以威湖南遂得以無事
有婦不宜於夫之商而歸婦爲具食食已
即死其舅姑以爲婦殺之無疑涉三獄而

婦不伏公親鞠之婦泣曰實無此志顧食
有魚肉以餓承之缺固在也公命取缺復
魚肉以飼犬犬斃因詢士人謂湖外有蜈
蚣盈尺一遇食即殺之公命索婦所果得
蜈蚣盈尺仍取魚肉飼犬復斃事立爲之
平反婦誓祝髮以報衆大悅服會敬夫定
夫扶魏公柩至州境不能入蜀公爲營葬
於屬縣寧鄉之西遂與敬夫講性命之學
日夕不輟築敬簡堂以爲論道之所而四
方之學者至焉公自篆顏淵問仁章於中

屏晦菴南軒各爲詩文以記之尋復待制
徙知荆南荆湖北路安撫使荆州當虜騎
之衝自建炎以來歲無寧日公內修外攘
百廢具興雖羽檄旁午民得休息築寸金
堤以免水患置萬盈倉以儲漕運爲國爲
民計也乾道五年己丑偶不豫遂力清祠
侍親疏凡數上帝深惜之進顯謨閣直學
士致仕南軒爲文以餞之荆南士民哭送
登舟仍給小像祀於湘中驛南軒爲之贊
既歸蕪湖凡縉紳之士莫不晉接宗戚渡

江而貧窘者公輒賑之新觀瀾亭以集同
志講論之餘徜徉山水寺觀臺榭吟咏殆
遍而悉爲之題識蕪湖都水陸之衝舟車
輻輳民甚苦之屢籍公爲之庇令邵宏淵
擁兵還鎮所過市肆皆空蕪民甚恐轉運
公與淵有識公作書以逆之至則自糴米
數百斛父子着紫衣乘使者車犒師江上
衆得餉揚帆而去遂秋毫無犯丞表益之
迎至江滸士民夾道指口夸艷庚寅冬疾
復作遂卒卒之日商賈爲之罷市兩河之

民惶惶如失所恃帝聞之惜其有用才不盡之嘆公性剛正不阿秦墳同登第官禮部侍郎一揖之外不交一言尤工翰墨嘗親書奏劄高宗見之曰必將名世詩詞雄麗尤工古調有于湖集四十卷嗟乎惟公起布衣被簡遇入司帝制出典藩翰議論風采文章政事卓然絕人歷事中外士師其道吏畏其威民懷其德所至有聲奈何筮仕之初見忘於檜既而不悅於湯旅進旅退向使得召行道天錫永年斯世斯道

之寄經天緯地之才當必有大過人者卒不能究其所施齋志以沒惜哉參知政事孝伯世稱賢相孝曾以節義聞孝才孝章以文學著公之諸兄弟也賢才萃於一門公實有以啓之子太平公易箒時方髫年從諸父徙宣城既而從事素書合門蔭不克磨勘者二十年今皇帝登極建元始得蒙例遙授登仕郎孫永通今授
即委予以傳以余嘗得侍公且生則同鄉徙則同邑知公之深也義不忍辭因摭實所聞

而次序之以備觀風者之採云紹熙五年
甲寅歷陽居士陸世良書於蕪湖介清堂
官誥八道

初補承事郎授鎮東簽判誥

勅賜進士及第張孝祥朕勅天之命夙夜
祇懼茲親策多士於庭爾以正對發明師
友淵源之義深契朕心擢冠羣英僉言惟
允授爾京秩贊畫輔藩此我朝待掄魁彝
典也往欽初命益務培養器業將於此乎
觀可補承事郎特差簽書鎮東軍節度判
官廳公事奉勅如右牒到奉行紹興二十
四年十一月十日

轉宣教郎誥

勅承事郎守秘書省校書郎兼國史實錄
院校勘張孝祥朕順古道率由舊章聖繼
聖明繼明共仰列宗謨烈之美疑傳疑信
傳信尚稽諸儒論譔之功固知放失之多
蓋亦顯承之缺是在武丁之孫子任亦匪
輕廼資叔向之春秋言皆可考成功惟允
褒律宜優爾學有淵源詞尚體要老氏藏

室聯輝奎壁之間曾史策名補藝炎興之際用已志鋪張而不詭合諸儒褒貶以爲功比及三年可傳百世有晉王虞宋徐沈之善無丘筍表高之譏卓識所資凜

著一王之法奏篇旣訖聿嚴六閣之藏論賞詔功涉明有典爰霑丹宸之渥申躋文右之階揚鴻烈而章緝熙旣籍發揮之力率純德以勵忠孝尚堅報稱之心可特授宣教郎依前秘書省校書郎兼國史實錄院校勘奉勅如右牒到奉行紹興二十七年正月二十日

除秘書郎誥

勅奉議郎秘書省校書郎兼國史實錄校勘張孝祥漢之藏書天祿東觀命馬融劉向爲郎至唐則掌四部圖籍有三人焉非第一流曷稱茲選爾以經術之淵源負倫魁之聲望曳裾冊府校讐言甚優秉筆史筵討論靡倦爰命進典中秘以倡斯文異日玉堂承明皆權輿乎此可依前奉議郎特授秘書郎兼國史實錄院校勘奉勅如右

牒到奉行紹興二十七年三月十六日

除著作郎誥

勅朝奉郎張孝祥承明金馬漢家著作之所也後闕

除禮部尚書郎誥

勅朝清郎張孝祥本朝除郎之路雖廣其要有三曰館閣曰寺監丞曰監司郡守近自列聖以來郎非監司郡守不可得雖然豈所以待倫魁者乎爾以清文奧學崇論鯁議對策大庭朕嘗親擢以冠多士入儀

班著夙稔直聲行已非磷緇立朝有本末朕未嘗不懷其賢也去把郡麾又淹家食起之槃澗俾佐秩宗於是得一佳禮部矣潔齊以俟朱袂方來可依前朝清郎特授禮部尚書員外郎奉勅如右牒到奉行年月闕

轉朝散大夫誥

勅朝奉大夫新除儀司郎官張孝祥等生民立君既尊居於大寶惟辟作福斯溥錫於湛恩茲予一人踐阼之初亦爾羣臣委

質之始粵從京秩遞進華階臣事君以忠
宜勤厥職官量能而授任嗣選爾勞張孝
祥可特授朝散大夫行尚書儀司郎官奉
勅如右牒到奉行隆興元年三月一日

陞中書舍人直學士院誥

勅朝奉大夫充集英殿修撰知平江軍府
事提舉學事張孝祥鳳掖演綸進涉玉堂
之漸鸞坡入直尊居鈴索之嚴矧惟翰墨
之司專掌絲綸之職念茲榮選必屬洪儒
爾學窮閩奧文冠倫魁治道敷陳洋洋晁

董之對皇猷潤色渾渾虞夏之書屢柄郡
麾久膺閣職茲緣西掖之班延入北門之
直啓沃謀猷鬯典謨於三代發揮詔命新
瞻聽於四方徃服寵章永堅素守可依前
朝奉大夫陞中書舍人直學士院奉勅如
右牒到奉行年月闕

除秘撰改知潭州權荆南提刑誥

中秘藏四部書班高論譔外臺奉三尺法
職重澄清式表儒猷以華使指原任左朝
奉大夫充集英殿修撰知靜江軍府事提

舉學士廣南西路兵馬都鈐轄兼本路經
畧安撫張孝祥卓爾不羣之意氣哀然魁
選之科名鳳尾批綸見稱古授之敏螭頭
載筆方篋直前之猷後闕

陞顯謨閣直學勅黃

尚書省牒朝議大夫敷文閣侍制荆南荆
湖北路安撫司張孝祥牒奉勅依前朝議
大夫陞顯謨閣直學士致仕牒至准勅乾
道五年三月三日

張南軒贈學士安國公敬簡堂記

二湖集附錄

一五

歷陽張侯安國治長沙旣踰時獄市清淨
庭無留滯以其閒暇闢堂爲燕息之所而
名以敬簡顧謂某曰僕之名堂蓋自比於
昔人起居之有戒也子其爲我敷暢厥義
某謝不敏一再不獲命因誦所聞而言曰
聖賢論爲政不曰才力蓋事物之來其端
無窮而人之才力雖極其大終有限量以
有限量應無窮恐未免反爲之役而有所
不給也吾子於此抑有要矣其惟敬乎蓋
心宰事物而敬者心之道所以生也生則

萬理森然而萬事之綱總攝於此凡至乎
吾前者吾則因而酬酢之故動雖微而吾
辦之若經緯黑白之分事雖大而吾處之
若起居飲食之常雖雜然並陳而釐分縷
析條理不紊無他其綱既立如鑑之形物
各止其分而不與之俱往也此所謂居敬
而行簡者歟若不知舉其綱而徒管之務
將見先生於所怠而患起於所忽乃所以
爲紛然多事矣故先覺君子謂飾私智以
爲竒非敬也簡細故以自崇非敬也非敬

則是心不存而萬事乖析矣可不畏歟雖
然若何而能敬克其所以害敬者則敬立
矣害敬者莫甚於人欲自容貌顏色辭氣
之間而察之天理人欲絲毫之分爾遏止
其欲而順保其理則敬在其中引而達之
擴而充之則將有常而日新日新而無窮
矣侯英邁不羣固已負當世之望誠能夙
夜警勵以進乎此則康濟之業可大而豈
特藩翰之景哉侯曰然則請書以爲記以
無忘子之言

朱晦翁贈學安國公敬簡堂詩

煌煌定方中農隙孟冬月君侯敞齋扉華
榜新未揭我來適茲時亦有大夫菱清觴
不留行晤語得超越更看雷雨勢翻動龍
蛇窟襟懷頓能舒肝膽亦已竭老僊來何
方湖海氣砒礪君侯歛袂起顛越承履襪
坐人驚創見引去殊卒卒伊爾不忍逝頓
首願有謁人生均秉彝天造豈停歇云何
利害判所較無一髮茲焉辦不早大本將
恐蹙吾與實自箴君聽未宜忽

張南軒贈學士安國公歸蕪湖序

客問於某曰張荊州之行子將何以告之
某應之曰吾將告之以講學客笑曰若是
哉吾子之迂也荊州早歲發策大廷天子
親擢爲第一盛名滿天下入司帝制出典
藩翰議論風采文章政事卓然絕人上流
重地暫茲徃牧所以寄任之意匪輕而天
下士亦莫不引領以當世功名屬於公也
夫以位達而名章任重而望隆吾子顧以
講學告之不亦迂乎某曰子以吾所謂講

學者果何也耶蓋天下之患莫大于自足自足則畫矣信如子言荊州若挾是數者以居則僕尚何道惟荊州方且退然若諸生曾無一毫見於顏色此僕之所以歎息慕向而講學之說是以敢發也蓋天下之物衆矣紛淪轆轤日更於前可喜可怒可慕可愕所以盪耳目而動心志者何可以數計而吾以藐然之身當之知誘于外一失其所止則遷於物夫人者統役萬物者也而顧乃爲役其可乎哉是以貴于講學也天下之事變亦不一矣幾微之形節奏之會毫髮呼吸之間得失利害有霄壤之勢吾朝夕與之接一有所滯塞則昧几而失節其發也不審則其應也必盪一事之隳萬事之所繇隳也豈不懼乎是以貴夫講學也夫惟講學而明理則執天下之物不固而應天下之變不膠吾於天下之物無所惡而物無以累我皆爲吾役者也吾於天下之事無所厭而事無以汨我皆吾心之妙用也豈不有餘裕乎又豈有窮極

乎然所謂講學者寧他求哉致其知而已
知者吾所固有也本之六經以發其蘊泛
觀千載以極其變即事即物身親格之超
然令夫大宗則德進業廣有其地矣夫然
故富貴不能淫貧賤不能移威武不能屈
居天下之廣居行天下之大道致君澤民
真古所謂大臣者矣然則學其可忽乎詩
曰如切如磋如琢如磨此之謂也某旣以
此告客於荊州之別也遂書以爲獻

祭于湖先生文

張栻南軒

嗟乎如君而止斯耶其英邁豪特其復可
得耶其如長江巨河奔逸洶湧渺然無際
而獨不見其東滙溟渤之時耶又如驂騶
驟駟追風絕塵一日千里而獨不見其日
暮稅駕之所耶此栻所以痛之深惜之至
而哭之悲也惟君起布衣被簡遇十年之
間入司帝命出領數路文章煒燁政事之
超卓多士之所共知亦不待栻之贊嘆惟
其孝友恂恂朝夕則人有不得而盡知者
方自荊州歸栻以書抵君謂及此閒暇專

意承志實進德修業之要君深以爲然孰
謂曾不數月乃有此聞拭傾蓋荷知見而
深篤言有勁切君不以爲迂此意何可忘
也道阻且長不得往哭遣致一奠孰知予
悲

贈于湖詩

張 栻

桐花三月英風雨滿江城使君晚被酒千
騎過友生名談宿霧捲逸氣孤雲橫揮
斤看翰墨笑語皆詩成人物有如此吾
輩賴主盟更呼南鄰客共此樽酒傾愛
我庭下竹頭角方崢嶸永懷冰雪姿寧復
世俗情新篇一湔袪凡木石足程願言對
封植歲晚長敷榮

于湖像贊

張 栻

是于湖君英邁偉特遇事卓然如箭破的
談笑翰墨如風無跡惟其胸中無有畛域
故所發施橫達四出雖然此固衆人之所
識也今方袖手于湖之上盡心以事其親
而益究其所未及則其所致又孰知其紀
極者耶

挽于湖

施士衡

湧泉詞筆坐中驚
天付斯文以道鳴
獨步蟾宮丹桂選
濡毫綸閣紫微清
絕絃慟哭人琴喪
埋玉淒涼柱石傾
一見那知成永別
重來天路問騎鯨

復挽

施士衡

十年帥鉞倦馳驅
適意方謀一壑居
賈誼有才終太傅
薛收無壽處中書
傷心風月江山石
過石光陰夢幻虛
紅紫飄零春色盡
後凋松栢獨蕭疎

挽于湖

沈約之

荒城難訪十全醫
半篋遺書世共悲
寧有故人憐阿鷺
但餘息女類文姬
忠籌屢畫平戎策
宦蹟常留墮淚碑
醉扣西州重回首
山陽鄰笛夜淒其

復挽

沈約之

氣槩凌雲孰敢先
中興事業冠英躔
朝廷議論一言定
翰墨風流四海傳
恰跨鰲頭升紫閣
忽騎箕尾上青天
竹林笑傲今陳跡
撫襯江臯涕泫然

弔于湖墓在秣陵

晚出白門下疲馬踏秋色鍾山度蒼翠慰
我遠遊客暮投清泉寺花草獻幽寂長廊
靜無人落日照西壁平生張于湖萬里去
一息翻然九州外汗漫跨鯨脊乾坤能幾
時安用較顏跖文章失津梁所念斯道厄
夜闌耿不寐搔首賦蕭索懷人感西風翁
仲守孤陌

褒禪山有于湖所題寶塔二字

羅端明

古刹浮屠映碧山狀元題墨最爲嫺遊人
倦憇塵心寂雲自青天水自閑

又

李敏系昌

路入亂雲堆僧房四面開龜泉半泥滓龍
洞已塵埃漱竹渾忘醉穿花浪費才何人
題寶塔千載仰崔嵬

和于湖萬杉寺詩 王阮

昭陵龍去奎文在萬歲靈杉守百神四十
二年真雨露山川草木只今春

復弔于湖先生 王阮

碧紗籠底墨纔乾
白玉樓中骨已寒
淚盡當時聯騎客
黃花時節獨來看

張于湖集附錄



圖書在版編目(CIP)數據

于湖居士文集/[宋]張孝祥撰.—北京:北京圖書館出版社,2006.12

(中華再造善本)

ISBN 7-5013-3270-3

I. 于… II. 張… III. 古典文學—作品集—中國—南宋 IV. I214.42

中國版本圖書館CIP數據核字(2006)第122265號

ISBN 7-5013-3270-3



9 787501 332700 >

書名 于湖居士文集(全十二冊)
著者 [宋]張孝祥 撰

出版 北京圖書館出版社(100034 北京市西城區文津街七號)
發行 Tel:(010)66151313 Fax:(010)66174391

E-mail:Blstfb@nlc.gov.cn

Website:www.nlcpress.com

印刷 金壇市古籍印刷廠

開本 八

印張 一一八·七五

版次 二〇〇六年十二月第一版第一次印刷

印數 一·二〇〇

書號 ISBN 7-5013-3270-3/K·1312
定價 三八〇〇圓

